

四庫全書

集部

欽定四庫全書

集部

元詩選初集卷五十四

詳校官中書臣王鵬

主事銜臣徐以坤覆勘

總校官編修臣王燕緒

校對官檢討臣溫常綬

謄錄監生臣王同獻

欽定四庫全書

元詩選初集卷五十四

庶吉士顧嗣立編

張都事憲

憲字思廉山陰人別號玉笥生負才自放走京師創言天下事衆駭其狂還富春山中一日升高望遠呼所親謂曰亟去三日逃寇猝至死者五百餘家始悔不用生言張氏據吳辟為樞密院都事吳亡變姓名走杭州思廉初薄遊四方

誓不娶不歸鄉里中遭兵亂混緇黃以自存晚
寄食報國寺以死其琴操序曰干戈不息殆且
十年余流連江湖間幽憂憤奮不見中興涯際
四方又無重耳小白之舉深山大澤所不忍言
將仗劍軍門而可依者何在乃作琴操十二章
以寄意其間周操云平既自夷兮報寧得不窮
其懷燕操云秋草兮芊芊黃金臺兮夷為淵悵
廣宇兮裂瓦望離宮兮生煙淚可盡兮目可穿

思昭王兮不可言思廉師事楊廉夫尤多懷古
感時之作廉夫曰吾用三體咏史古樂府不易
到吾門惟張憲能之又曰吾鐵門稱能詩者南
北凡百餘人求其似憲及吳下衮華輩者不能
十人明成化初安成劉紆序其集曰思廉與鐵
崖諸君同為一時能言之士當元季擾攘志不
獲伸才不克售傷時感物而洩其悲憤於詩此
可謂思廉之知己也已

秦鹿行

望夷宮中養秦鹿百二山河春草綠穿花尚作呦呦鳴
寧識外人須爾肉李斯父子牽黃犬上蔡東門志何淺
血污雲陽腰領紅狡兔縱肥能幾鬻閭高貌軟足心路
稱馬獻君君不悟羣臣相視莫敢非只恐出言丞相怒
丞相怒秦祚移函谷不守秦鹿馳高才疾足爭逐之項
王叱咤起烏騅日千里逐之不得不肯止人疲馬困烏
江死沛公隱芒碭手劒三尺長網羅一舉圍咸陽扼其

角剗其腸食肉寢皮傳後王秦鹿死走狗烹後人不用
悲韓彭帝王神器匪力爭炎炎火德多洪福前有高皇
後文叔回首平靈莽卓生漢業亦同焦下鹿

鴻門會

雲成龍氣成虎椎鼓撞鐘宴真主披帷壯士髮指冠側
盾當筵請公舞白髮老臣心獨苦玉玦三看君不語五
星東井夜聯珠天狗橈檣落如雨鴻溝咫尺接鴻門千
里神雕一夜奔君不見龍泉影裏重瞳瞽玉斗聲中五

體分

朱虛侯行酒歌

長樂宮中女天子盛設賓筵懼戚里百官侍坐莫敢違
諸呂誼闐笑聲起御史中丞不糾儀叔孫制作成虛禮
朱虛奉敕起行觴手提三尺昆吾鋼田歌聲振野雞伏
頸血光寒漢道昌

上元夫人詞

七月七日夜王母降漢宮上元何夫人儀衛畧與同頭

作三角髻年可二十餘身著青霜袍坐擁紫霞車九雲
夜光冠六山火玉佩斂袂登殿階進向王母拜王母坐
止之呼與共良會翩翩三青鳥飛來綠窗歇口銜七蟠
桃甘脆勝冰雪劉郎非仙器內慾未斷絕懷核欲種之
開花待桃結一桃九千年徒爾縻歲月上仙啞然笑忽
逐綠雲滅

東門行

東都門外今古稀東宮二傅同日歸百官祖道設供帳

敕賜黃金作酒貲歸來日日會親友盡賣賜金買醇酒
白頭剛傳蕭望之也空勞勞一杯鴟羽不就獄博得君王祠

少牢

井底蛙

公孫述

清水令井底蛙鸞旗旄騎稱警蹕垂旒佩玉登龍車不
知天下本一家雌雄未決胡矜夸井底蛙井中小堂堂
東帝天日表南廡岸幘彼何心都布單衣笑君狡君不
見故人共卧嚴子陵一夜客星侵帝星何嘗解作木偶

形

梁父吟

武侯成就關張勝晏子
殺三士多矣故反其詞

伏龍隱南陽高卧久未起不肯渡長江馬能涉漳水炎
炎火絕卯金刀巍巍土王當塗高種瓜兒子不力戰織
履郎君無地逃伏龍一起捍坤軸雄據西南成鼎足十
年汗血戰玄黃五出王師爭九六萬人之敵兩熊虎百
戰辛勤事行伍河南河北漫稱雄不得袁曹一丸土伏
龍纔起帝業新千古君臣魚水親遂使真龍全羽翼風

雲成就二將軍

南飛鳥

曹操

南飛鳥尾畢逋白頭啞啞將衆離渭河西岸逐野馬

破黃

中也

白門東樓追赤兔

擒呂布也

冀豚

素

荆犬

劉琮

肉不飽展翼

南飛向江表江東林木多俊禽不許南枝三匝遶老烏

莫侮髯郎小髯郎詎讓老烏老東風一炬烏尾焦不使

老烏矜觜爪老烏自謂足姦狡豈信江湖多鷲鳥捭烏

頭啄烏腦不容老烏棲樹枝肯使蛟龍戲池沼

赤壁之戰

釋

老烏未肯搏紫髯大耳先相攫河東老羽雲外落

雲長死

老烏巢成哺銅雀

縛虎行

白門樓下兵合圍白門樓上虎伏威戰尖不捍丈二尾
袍花已脫斑斕衣捽虎腦截虎爪眼中視虎如貓小猛
跳不越當塗高血吻空腥千里草養虎肉不飽虎饑能
噬人縛虎繩不急繩寬虎無親座中叵信劉將軍
先主不縱猛虎食漢賊反殺猛虎生賊臣食原
丁食草董何足

嘖

夕陽亭

晉裴楷惡賈充薦充督秦涼諸軍充問計於荀勗曰辭之實難獨結婚太子可不辭

而自留矣充妻遂貽楊后左
右納其女南風果留不違

百官供帳紛營營夕陽亭西誰遠行充問之子專閭錢
仗節萬里西南征結婚一語聾天耳既鑿凶門行復止
衛家五美空善評姦謀仍落三豎子君不見鬼公怒攝
項城軍殘喘聊延衛府勲枯木劍鋒金屑酒天刑猶脫
廣成君

玩鞭亭

晉王敦在姑孰明帝出看聚營敦夢覺遂
帝帝以馬鞭與老姥及追者至問姥玩鞭

帝遂去
追不及

畸烏壓營營作聲紅光紫電圍金鉦黃鬚小龍馬上笑
白首饑豺夢裏驚老奴怒擲珊瑚枕追兵起合琉璃井
巴馬東歸疾似風道傍遺糞如冰冷健兒空玩七寶鞭
荆臺老姥功誰傳

胭脂井

陳後主

胭脂井瑪瑙甃琉璃闌黃金轆轤銀綆寒桃花小波下

無底雌龍古怨沈紅水妖姬不作井中鬼玉樹飛花落如雨

代魏徵田舍翁詞

鐵崖楊先生以殺田舍翁為文皇根心語益徵好直諫忤意者

數矣是必有弗堪其直者故怒曰會須殺此田舍翁不覺其言之出口也此則是也然謂徵東宮臣節之虧故為太宗所薄而呼為田舍翁者此則非也徵能入夢於太宗而不能自明具事故代田舍翁詞

補徵諫錄云

臣本山東農臣誠田舍翁臣以隋末亂出仕蒲山公蒲山愼諫自用故臣言不用臣計不從百萬糧一日盡百

萬衆一夕空力屈事去歸山東臣義不忍棄故土事仇
充相隨西來朝真龍先帝不臣識大臣不臣通故臣上
書自請安山東山東歸皇圖授臣洗馬之職在東宮東
宮多不德兄弟不相容臣教太子翦黑閹親元戎又教
太子除陛下太子不臣庸太子既死先帝命臣聽陛下
處分臣安敢效匹夫小諒自興逆黨同陛下以臣盡心
所事赦臣死罪除臣秘書登臣政府爵位崇臣於是感
激時時進諫開皇東陛下幸而時聽臣言以致四海太

平年穀豐使陛下功德及堯舜則臣心喜小有過失則
臣心忡是以不四年中而有三代風陛下初年誠心聽
諫故天耳聰今聽諫不逮昔故夫耳聾往以未治為憂
故人心悅今以既治為安故威德隆往日用臣言賜臣
以黃金甕天殿驄輟殿材構臣屋與墉今日以人言仆
臣墓碑傳臣子婚為惠胡不終喜臣則謂嫵媚惡臣則
詈臣田舍翁陛下不宜以喜怒毀譽損厥躬臣薦侯與
杜謂其才畧雄臣豈阿黨預知其終凶臣錄諫疏草前

後三百封欲使後世知陛下能聽諫致時雍豈欲賣直
歸過為己功避嫌焚草徒足恭臣幸而身先朝露使臣
不幸恐不免隨比干侶龍逢獨不記臣言良與忠胡為
乎會須殺此田舍翁田舍翁豈畏死但惜陛下既殺張
亮又誅劉洎翦刈大臣如刈蓬臣不願陛下祠少牢立
仆石但願陛下養氣質除內訌毋以喜怒存諸胷大臣
無災帝德穹社稷無虞王業鴻千秋萬歲為唐宗老臣
不諱田舍翁於乎老臣不諱田舍翁

聖母神皇詞

則天

東風未燥昭陵土感業尼稱天下母唐室山河忽變周
李氏兒郎更姓武洛水泱泱出寶圖黃金爛爛鑄天樞
五王不入迎仙院二豎能忘受命符君不見漢家元后
號文母廟食從來姪祀姑

匡復府

揚州都督開三府十萬強兵猛如虎駱生長檄魏生謀
大義精忠照千古山東豪傑望旌旗蓄縮江淮立伯基

莫指金陵圖王氣石梁鴉噪髑髏悲

雙廟詞

睢陽戰敗血飄杵力屈猶思為厲鬼
玄元祠前哭一聲
朝食愛姬莫羅鼠唐家宮殿秋草生
二十一陵如掌平
獨遺雙廟門前石日有行人來繫牲

大腹兒

磨巫夜禱輒犂山淫光下燭穹廬寒
柳城胡兒不敢睡
四野惡聲號狗犴猪龍怒磔老梟腹
鱗甲粗疎頭角禿

婪酣大肚三百斤偷得真龍半分福平盧寶刀未發

范陽羶帳先潛形

一作范陽羶帳妖潛形平盧寶刀遲發

金雞口吐東北

赦青驪蹠作西南聲鳳凰池荒

一作春池

金鏡破獅鷹臺傾

一作霜臺

胡眼大東風野鹿嚼楊花白日妖狐登御座華清

玉甃湯作泉洗兒果撒黃金錢并刀剪綵十六幅錦綸

壓碎宮娥肩象牀夜冷嬰兒哭猪龍爪破金訶玉香齏

不痛荔枝漿雄心已飽雞頭肉長安天奪蜜口臣銅頭

鬼鼓漁陽塵赤心一夜變胡腹二十四郡都

一作俱

無人

潼關夜漏雞聲早馬鬼坡下冰山倒劒門西寄杜鵑巢
練帶玉環埋翠草嘉山土門勤戰功猪兒帳下屠猪龍
旄頭星落大腹破機上鸞刀一尺紅

此詩一刻成
廷珪恐誤

餞梁王

壽春殿延喜樓梁王欲歸天子留樓前百戲排倡優百
官陪宴酬未休梁王上馬樓上頭梁王東歸天子愁天
子愁梁王喜鵲梟暗移傳國璽碣山王氣瓏璚起皇后
捧金卮天子歌柳枝家亡國破無多時

讀此不覺涕泗
橫流恨不剗刀

賊臣以快其心
河東鴉兒獨眼窺
紇干凍雀死不飛
灞橋送客那得知

李天下

沙陀一夜鴉兒死
夾寨隄邊黃霧起
三枝誓箭挂馬鞍
誓與先王刷遺恥
六年河上幾辛苦
纔得河南一丸土
盧龍悖子雖剖心
耶律跳梁猶未虜
櫛風沐雨壯志荒
傅粉塗朱樂未央
癩臬本為太原孽
驕子都化邯鄲倡
歌吳歆習趙舞
吹玉笙擊花鼓
十萬貔貅介冑雄
三千

粉黛煙花主呼優名李天下龍顏輕批面如赭法刀不
斬敬心磨鏡破銅光解如瓦魏州總管著柘黃門高流
天生金瘡劉尼不進銀餅醴鳳瑟鸞箏殉龍體君不見
鐵鎗將軍有先知鬪雞咬犬呼小兒

陳橋行

唐宮夜祝邈佶烈憂民一念通天闕帝星下射甲馬營
紫霧紅光掩明月殿前點檢作天子方頤大口空誅死
重光相盪兩金烏十幅黃旗上龍體中書相公掌穿爪

不死不忍秘鴻寶畫舫學士獨先幾禪授雄文袖中草
君不見五十三年血載塗五家八姓相吞屠陳橋亂卒
不擁馬撫掌先生肯墜驢

金櫃書

約誓書金櫃藏不鑒柴家幼兒祚不長弟兄子姪相繼
作書記署名傳晉王金櫃書藏禍府肘腋奇兇起慈母
深宮燭影夜無人漏下嚴更天四鼓寡婦孤兒不敢唬
截地有聲金柱介太平王子著龍衣定策元勲孰敢非

藝祖有靈君莫急朱牌金字火羊飛

一網謠

李綱

一網舉萬目張建炎帝開重光首竄賣國牙繼誅易姓
王募軍買馬事戰備誓為吾君復舊疆忤汪黃七十五
日中書堂奉祠已落張公章沒嗟乎一網去萬目弛邊
馬長驅飲江水張公督戰方未已張公督戰方未已

岳鄂王歌

君不見南薰門鐵鑪步神矛丈八舞長蛇雙練銀光如

雨注又不見鐵浮屠拐子馬斫鏑鋼刀飛白霜貫陣背
鬼紛解瓦義旗所指人不驚王師到處壺漿迎兩河忠
義望風附褭鄧荆湖唾手寧朱仙鎮上馬如虎百戰經
營心獨苦賜環竟壞迴天功卷旆歸來卧樞府錢塘宮
殿春風輕嬌兒安宴醉未醒徒令功臣三十六舞女歌
兒樂太平虎頭將軍面如鐵義膽忠肝向誰說只將和
議兩封書往拭先皇目中血將軍將軍通軍術君命不
受未為失大夫出疆事從權鐵馬長驅功可必功成解

甲面赤墀拜表謝罪死不遲惜哉忠義重山岳智不及
此良可悲烏乎肆讒言加毒手申王心循王口斬王湖
上乘驢走五國城頭帝鬼唬健兒相酌平安酒

咸淳師相

賈似道

咸淳師相專軍國堂吏館賓供羽翼諸司百職聽使令
臺諫承顏言路塞輪舟五日一入朝湖山佳處多逍遙
諛言佞語頌功德邊事軍聲聽寂寥半閒堂連多寶閣
歌姬舞妓相懽樂十年國勢盡傾摧猶謂師臣堪付託

師臣師臣躬督兵珠金沙頭羅一聲十三萬人齊解甲
寡婦孤兒俱北行君不見黯淡溪流東復東木棉花開
生悲風師臣不忍馬革裹廁上有人能拉胃

厓山行

已上
詠史

三宮銜壁國步絕燭天炎火隨風滅間關海道續瑩光
力戰厓山猶一決午潮樂作兵合圍一字舟崩遂不支
檣旗倒仆百官散十萬健兒浮血屍皇天不遺一塊肉
一瓣香焚海舟覆猶有孤臣卧小樓南面從容就刑戮

行路難

行路難前有黃河之水後有太行之山車聲宛轉羊腸
坂馬足蹭蹬人頭闢白日叫虎豹腥風號狗獾拔劍顧
四野使我摧心肝東歸既無家西去何時還行路難重
咨嗟乞食淮陰市報仇博浪沙一劍不養身千金徒破
家古來未際皆紛拏行路難多岐路馬援不受井蛙囚
范增已被重瞳誤良禽擇木乃下棲不用漂流歎遲莫

將進酒

酒如澠肉如陵趙婦鼓寶瑟秦妻彈銀箏歌兒舞女列
滿庭珊瑚案玻瓈嬰紫絲步障金雀屏客人在門主出
迎蓮花玉杯雙手擎主人勸客客勿停十圍畫燭夜繼
明但願千日醉不願一日醒世間寵辱何足驚珠萬斛
金千贏來日大難君須行胡不飲此長命觥劉伯倫王
無功醉鄉深處了平生英雄萬古瘞黃土惟有二子全
其名

房中思

紅象作小梳髻龍盤漆髮香泥擣守宮染透桃花骨白
馬不歸來倚牀弄紅拂桂陰綠團團坐對玲瓏月

銅雀妓

陵樹日沈西秋風石馬嘶芳尊傾總帳詎肯濕黃泥慘
慘笙歌合遙遙望眼迷玉人脆如草能得幾回嗁

火府告斗

黃中騎馬騰紅雲綠章細書天篆文芙蓉小冠切白玉
伏地夜奏中天君灼灼桃花映羊首電繞魁罡百怪走

九皇一笑帝車移銀鹿作靶霞注酒玉衡閃爍招搖光
人間塵土何茫茫石家買得綠珠笑五雲踊地椒壁香
短衣吹秋車武子乾抱流螢照書紙虛空喉舌正司權
杳杳冥冥注生死

端午詞

榴花照鬢雲髻熟蟬翼輕綃香疊雪一丈戎葵倚繡窗
雨足江南好時節五色靈錢傍午燒綠勝金花貼鼓腰
段家橋下水如潮東船奪得西船標櫂歌聲靜晚山綠

萬鎰黃金一日銷

白苧舞詞

吳宮美人青犢刀自裁
白苧製舞袍輕雲冉冉白勝雪
激楚一曲回風高九雛鳳釵
簪紫玉長裙窄腰蓮步促
翩翩素袖啟朱櫻金籠鸚鵡飛
來熟館娃樓閣搖春暉
臺城少年醉忘歸瑤窗綺戶鎖
風色桃樹日長蝴蝶飛
傾城獨立世希有罷吟綠水停
楊柳急管繁絃莫苦催
真珠賸買烏程酒

夜坐吟

蜻蜓頭落燈花黑
瓦面寒蟾弄霜色
玉壺水動漏聲乾
夜冷蓮籌三十刻
蓬頭兒子凍磨墨
欲拾羈懷尋不得
起看庭樹響風箏
斗杓墮地天盤側

秋夢引

翠翹半暉雙飛鳳
轆轤金井懸銀甕
萬絲翠霧刷鴉光
兩點秋波和淚送
笑容帶露不忍折
鸚鵡隔籠時自哢
多情宋玉正悲秋
故放香魂入秋夢

楊花詞

東風吹春春不醒
桃花杏花空娉婷
萬絲剪綠暗如霧
千里相思長短亭
亭前女兒十六七
手挽柔條背春日
六街馬蹄蹋黃塵
雪花漫天愁殺人

出自薊北門行

出自薊北門遙望瀚海隅
黃沙落寒鴈衰草號雄狐
河水血成水土塚碑當塗
乃知古戰場本是賢王都
武皇昔按劍一怒萬骨枯
半夜下兵帖六郡皆謹呼
將軍各

上馬百道追匈奴羊馬滿大野萬帳收穹廬英英長平
侯六驪走單于至今青史上猶壯武剛車

當壚曲擬梁簡文帝

初八月上絃十五月正圓當壚設夜酒客有黃金錢
懽濃易得晚別遠動經年相送大隄上舉杯良可憐

胡姬年十五擬劉越石

胡姬年十五芍藥正含葩何處相逢好并州賣酒家
面開春月滿眉抹遠山斜一笑既相許何須羅扇遮

春晝遲

樓觀參差半空起
縹緲闌干煙霧裏
綠萍一道浸鴛鴦
笑聲只隔桃花水
柳下粉牆斜靠街
當晝紅門半扇開
遊絲冉冉挂簷角
燕子一雙何處來

江南弄

茭尾蒲芽水新足
沙暖小桃紅夾竹
誰家燕燕倦東風
戢翼畫梁春睡熟
鵲頭舫子載醺醪
勿惜千金買詞曲
明朝風雨蔽九川
千里江南芳樹綠

哀亡國

買桑餒蠶絲不多鑿注種藕蓮幾何廣陵夜月瑤花宴
結綺春風玉樹歌君不見黑頭江令承恩早白髮蕭娘
情未了狎語淫人夢不醒宮城綠遍王孫草昏昏黃霧
塞宮門白練寒生玉頸痕錦繡江山春似畫幾傷風雨
弔迷魂

瑤池曲

曼倩嗁饑桃未熟綺窗珠樹層陰綠上清童子晝臨闕

鸞尾埽雲方種玉
芙蓉畫闌春晝長
簫韶一派起回廊
八龍未暇送周穆
三鳥遽能迎漢皇
風雨蒼蒼隔一作蔽
玄圃不勞西望祠
王母贈君桃核大
如杯歸植茂陵陵
上土

襄陽白銅鞮曲

襄陽白銅鞮
下蹋揚州郭
可憐揚州兒
棄戈甘面縛
大隄女兒何
命薄
青年坐失榮
華樂
蕩子功成未肯歸
閉門三月楊花落

神弦十一曲

三錄

聖郎

雙頭牡丹大如斗簇金小帽銀花鏤綠鬪長眉丹激脣
白馬黃衫灌江口平頭奴子金絲髮六尺竹弓開滿月
神葵帖尾卧牀前頑蛟尚染刀鏤血靈風颼颼石犀吼
吳船楚舵紛搔首紅雲忽報七聖來蜀波水色濃於酒

青溪小姑

香鑪盤盤青霧起靈帷撒動金錢紙練帶斜垂八尺水

纏項白蛇神色死青溪小姑雙露乳起著神衫代神語
花裙繡袴跣旋風雙袖翻飛小蠻舞西山日落雲冥冥
金龍畫燭鎗光青土妖木魅作人立古壁空廊聞履聲
繁絃嘈雜社鼓吼體挂羊腸磔牛首扶神上馬送神歸
老狐醉卧簷前柳

湖龍姑

洞庭八月明月寒湖龍捧出玻瓈盤湖風忽來浪如山
銀城雪屋相飛翻白鼉樹尾月中泣倒卷君山輕一粒

浪花拍碎回仙樓萬斛龍驤半天立雨師騎羊轟晝雷
紅旗照波水路開青娥翼髮紅藍腮紫絲絡頭垂黃能
神絃調急龍姑來

天狼謠

煌煌天狼星芒角射參昴獨步天東南煜煜竟昏曉天
弧不上弦金虎歛牙爪萬里食行人白骨遍荒草火熱
烏龍岡血染朱雀航列宿不盡力五緯分乖張戍客困
疆場荷戈涕成行誰為補天手為洗日重光

子夜吳聲四時歌四首

朱雀街頭雨烏衣巷口風飛來雙燕子不入景陽宮為
問秦淮女還知玉樹空

湖上水雲綠荷花十里香伊啞木蘭櫂驚起睡鴛鴦
雄兩分去不覺斷人腸

白苧鴉頭鞭紅綾錦鞦韆玉階零露冷羞折鳳仙花去
去蕩遊子秋深不念家

瓦上松雪落鐙前夜有聲起持白玉尺呵手製吳綾纔

紉一作得征袍縫邊庭草又青

估客行二首

發舟石頭城繫舟梅根渚江月夜寥寥照見家人語
割裳製家書刺指題日月不知何時到但記今朝發

紅門曲

紅門欲開人漸稀棲鳥啞啞漫天飛西宮寶燭明如晝
玉筵圍坐諸嬪妃黃羊夜剝博兒赤金梳銀鐺進魚炙
銀漢依微白玉橋隔花宮漏夜迢迢內城馬嘶丞相朝

富陽行

搖首上馬金鞭揮山頭白旗如鳥飛西來萬騎蜜蜂蟻
四面鼓聲齊合圍金城木柵大如斗五百貔貅誇善守
鐵關不啟火筒焦力屈花獐皆自走城南城北血成窪
十里火雲飛火鴉將軍豪飲不追殺掠盡野民三百家

燭龍行

燭龍燭龍女居陰山之陰大漠之野視為晝瞑為夜吸
為冬噓為夏虵身人面髮如赭銜珠吐光照天下天地

寬日月小烏兔盤旋行不了窮陰極漠無昏曉女代天
光補天眇女乃不知日被黑子遮月為妖篡食五緯無
精光萬象盡奪色下民煢煢昏昏惑燭龍燭龍代天職
胡不張爾鬣奮爾翼磨牙礪爪起圖南遍吐神光照南
極補缺免無損傷正畸烏不傾畏妖篡黑子紛誅殛重
光重輪開萬國胡為藏頭縮尾窮陰北坐視乾坤黯然
黑乾坤若崩摧吾恐女龍有神無處匿

白翎雀

真人一統開正朔馬上鞢褭手親作教坊國手碩德間
傳得開基太平樂檀槽鈇鈇鳳凰齧十四銀鏐挂冰索
摩訶不作兜勒聲聽奏筵前白翎雀霜矚矚風殼殼白
草黃雲日色薄玲瓏碎玉九天來亂撒冰花灑檀幕玉
翎琤琤起盤礴左旋右折入寥廓宰律孤高繞羊角啾
啾百鳥紛參錯須臾力倦忽下躍萬點寒星墜叢薄碧
然一聲震龍撥一十四絃喑一抹駕鵝飛起莫雲平鷺
鳥東來海天闊黃羊之尾文豹胎玉液淋漓萬壽杯九

龍殿高紫帳暖蹋歌聲裏懽如雷白翎雀樂極哀節婦
死忠臣摧八十一年生草萊鼎湖龍去何時回

傷魂號血行

白面於菟行偃草雄劍為牙戟為爪夜越鐵關吞九牛
弱婦嬰兒眼中飽郊原十里吹腥風白骨塞途秋草紅
肝腸挂樹野鴉噪鬼火照城人跡空嗚呼獵師心力巧
藥箭無功機發早舊魂走抱新魂號一夜黑風天亦老

孟城吟

孟城如斗復如鐵百萬天兵半魚鼈狼星燭地響晴雷
白馬將軍夜流血匣中寶劍寒生雷一擊能令太山缺
怒提往斷落星丸獻與師臣補天裂

集賽行

集賽兒郎年十八手中弓箭無虛發黃昏偷出齊化門
大王莊前行劫奪通州到城四十里飛馬歸來門未啟
平明立在白玉墀上直不曾違寸晷兩廂巡警不敢疑
留守親姪尚書兒官軍但追上馬賊星夜又差都指揮

都指揮宜少止不用移文捕新李賊魁近在王城裏

枕花馬歌

房星下飲瑤池清神光夜化花龍精東風滿背騎不得
冰痕淨洗黃魚腥斑斑朱英點晴雪滴滴真珠汗凝血
高蹠蹴蹋花雨香仰面嘶春春正熱周家穆滿遊玄圃
萬里西馳覲王母青絲繫樹搖玉珂錦繡叢中五雲舞
歸來復入玄都觀紫陌韶華政零亂天閑不數連錢驄
路人只作文彪看天台九曲溪流芳解鞍春水浮丹光

劉郎牽入落花去撲面玉鞭蝴蝶忙風流自許王武子
未信叔癡癡不語千年駿骨作銅聲燕昭臺高金似土

二月八日遊皇城西華門外觀嘉孖弟走馬歌

春風壓城紫燕飛繡鞍寶勒生光輝軟沙

一作
莎

青草

一作

青平似鏡花雨滿巾風滿衣潛蛟雙綰玉抱肚朱鬣分

光散紅霧金龍五爪蟠彩袍滿背真珠撒秋露生援俊

健雙臂長左脚躡

一作
撥

銙石蹴韁銅鏡四扇遶十指玉

聲珠碎金琅璫黃蛇下飲電掣地錦鷹打兔起復墜袖

雲突兀鞍面空銀甕馳囊兩邊緹西宮綵樓高插天鳳
凰綵繞排神仙玉皇拍闌誤一笑不覺四蹠如迸煙神
駒長鳴背凝血郎君轉面醉眼纈天恩翦下五色雲打

鼓歸來汗如雪

原評云嘔出錦心可與桃花爭奇決非驢上詩人語也

附宛平主簿驢馬歌序云宛平火主簿堂訪余於大都雙橋里指其所來驢馬曰能騎此否余笑曰虎則不能若馬也余固能之矣適翰林承旨汪閭台從騎三十餘自西而東既過余乃執策就馬尼甫及鐙則已奮迅馳突入翰林隊中矣羣馬辟易于煙塵中但聞翰林屬聲曰好馬南馳至雙橋越壘而過俯身就韁鞭比及手已馳過樞密院街矣遂縱轡至哈達門而回主簿訝余久不返騎他馬來追遇于天師菴執

手大笑並轡歸飲渴下初鼓乃散觀此可
見玉筍生一片雄心前所評固不虛矣

烏拉海元帥斬新李行

中原惡少稱新李八尺長軀勇無比鐵槍丈二滾銀龍
白面烏雕日千里攻州劫縣莫敢撓烏羊渾脫縵胡纓
輕車壯士三十兩戰則為陣屯為營殿前將軍不敢搏
羽林孤兒甘受縛柳林道上掠寶車獨樹堆邊劄羶幕
吐蕃老帥西南來虎頭不挂三珠牌弊裘羸馬失故態
寶刀繡澀廬生埃步入中書謁師相願請借一作長纓三

百丈生縛凶魁獻至尊不使朝廷乏名將相臣入奏大明宮玉音特賜天廡驄親軍百騎備兩翼綠旗盡出東華東硬弓二石力逾弩長驅夜走涿城下土岡無樹一作處著伏兵兩陣相當如怒虎彎彎弓弮抱團月點點槍尖飛急雪神騅未隨白羽仆賊顱已逐青萍缺一騎平原報捷歸天狗有聲流作血

北庭宣元杰西番刀歌

此刀乃江浙平章故
化公征淮西所佩者

金神起持水火齊煅鍊陰陽結精銳七月七日授冶師

手作鉗鉞股為礪一千七百七十鋒脊高體狹刀口洪
龍飛蛟化歲月久阮師舊物今無蹤呱哇繡鎖柔可曲
東倭純鋼不受觸賢侯示我西番刀名壓古今刀劍錄
三尖兩刃圭首圓劍脊點點生黑煙朱砂斑痕點人血
雕青皮軟金鉤聯唐人寶刀誇大食於今利器稱米息
十年土澗松紋生戎王造時當月蝕平章遺佩固有神
朱高固始多奇勲三公重器不虛授往繼王祥作輔臣
戲贈乍浦稅使歌

去年四月雨如竹錢幣不行百姓哭故人走馬初一官
日日誅求征稅足今年四月雨如箭海賊東來船著岸
土兵東走百姓空商征不成官吏散故人本是西河夫
殺賊得官心氣麤如何臨難乃無勇不敢東向鳴桑弧
君不見彭城劉寄奴長刀獨戰今非無

原評云詞氣豪宕可以激立顏

靡

王帶生歌

并序

王帶生端人也事文山丞相為文墨賓與同館謝先

生翺友善宋革丞相殉國死訃聞生與翺哭于西
臺之下復憫宋諸陵暴露私相蓋覆識以冬青木
而去後翺道卒生今歸會稽祀遺老人與秋聲子
輩為寮中七客初宋上皇以丞相恩賜生紫衣玉
帶至今不改其舊服生為人端厚強記默識不妄
開口丞相素重之呼召不以名但曰玉帶生故作
玉帶生歌

鸞刀夜割黑龍尾碾作端溪蒼玉砥花鑲鐵面一尺方

紫霧紅光上書几銀絲雙纏玉腰圍翡翠青斑繡紫衣
金星鵠眼不敢現案上墨花皆倒飛景炎丞相魁龍榜
撫玩不殊珠在掌背銘刻骨四十四

文山硯銘丹書小篆四十四字云紫

之衣兮縣絲玉之帶兮磷磷中之藏兮淵淵外之澤兮
日宣烏乎磨爾心之堅兮壽吾文之傳兮廬陵文天祥
造
血錄至今猶可想謝公古文今所師西臺一慟神血

垂獨持老瓦出門去冬青樹邊書憤詞天翻地覆神鬼
怒九廟成灰陵骨露廬陵忠魂上騎箕流落端生何所
寓北遺老人生計拙愛把文章寫忠烈霜毫一夜電光

飛不必矮桑重鑄鐵

夏蓋山石鼓謠

鼓高一丈徑三尺下有盤石為足謠云石鼓鳴三吳兵

臨平石鼓不自鳴直待蜀桐魚作形陳倉石鼓載文字
徒有鼓形無鼓聲夏蓋之石或自鳴蓋石一鳴三吳兵
嗚呼三吳十年厭干櫓不緣夏蓋鳴石鼓

汎舟黃顙湖望梅山

汎舟黃顙湖望見梅仙山嵯峨結實髻晶林浮銀灣長
風蕩青蘋雪浪相飛翻魚龍現怪誕水怒山自閒詎知

神靈意杳在虛無間
緬思學仙尉一去何時還
幽姿不可見高風邈難攀
落日動簫鼓把酒酬潺湲

冬夜聞雷有感

陽氣渙不收梨花開九月
無何玄冬夜火靈飛列缺疾
雷故判司大雨久不輟
頑雲聚復散淫風赤如血
蟲豸不入藏龍蛇競出穴
寒威變融煥四序失故節
胡為數歲中雷向盛冬發
委靡不執柄遂為羣陰竊
及其不可忍奮迅始一決
乃於涸寒時礪礪未肯歇
龍戰久不解

險難紛糾結既乖長養意愈使威權褻天怒不終朝王
綱有時裂何能堯吾君調理繼稷契先事誅權奸以次
及羣孽假爾霹靂車為吾左黃鉞普天新號令坐使萬
國悅煌煌世祖業中道復光烈

秋日古城葉希聖見訪

夫君滄海來訪予清溪曲清溪窈而深佳氣散天旭塘
蒲澤新雨秋意冷可掬鳥鳴萬山靜猿下雙樹綠相看
語清晤一作晤未晤語清餘響起空谷坐久神宇閒斜陽在萬

木

於潛點砦經托和齊石丞戰地

路迴山麓交直壁萬仞立浮嵐滴空翠下浸澄泓濕長
巒拱天嶽壞道駛礮急春彼巖險勢一夫自敵十要地
不力戰崩奔胡可戢哀哀左轄公馬革臥原隰孰知王
師重戴首奉賊級我來訪戰地一慟已莫及日入鬼燐
生陰風國殤泣

自臨安往富春過芝泥嶺示隨行李巡檢

平明升肩輿相與東西征浮嵐翳遠道宛在雲中行連
山互低昂曲折如送迎接天蔽喬木澗與風爭聲前登
芝泥嶺雨意漸覺晴曛曠日色薄蕭瑟衣裳輕畏途見
鹿角高岩屯鄉兵綵旗病目眩嚴鼓羈魂驚憑軾若夢
寐撫觔傷浮生顧謂李飛尉我行猶幾程

臨安道中先寄賔景初

朝入臨安山莫上由拳嶺周道無行蹤晴空斷飛影嚴
關固高柵疊嶂列危屏荒垌斜日淡虛市野煙冷息肩

坐茂樹瞑目發深省何庸

一作事

馬蹄塵兵鋒迭馳騁

我有二首

我有駢角弓百步能破敵力強不受檠材美陋越棘時
能斃飛將萬騎莫敢逼翻翻鐵絲箭剌剌金瓜鎗鼓寒
霜氣重應手響霹靂豈惟射渠魁眼中已無敵雄哉兩
橐鞬儼若左右翼時來亦大用不偶直暫塞我弓雖少
置未許楚人得

我有鴈翎刀寒光耀冰雪神鋒三尺強落手斷金鐵在

昔臨元戎志在除草竊怒來死不顧決背肝膽裂老蛟
遶腰臥夜枕寒泉冽維時誠女賴豈忍時暫輟中途偶
棄置竟踐秋扇輟塵埋土花暗繡澀神氣滅思之終永
傷默坐慘不悅敢忘漢宣詔不負呂虔說金風吹秋郊
賊馬政侵軼又當攜女去舊義未遽絕莫瑩鵬鵠膏恐
汚荆卿血

席上

彼美瑤林姬綠雲何盤盤清歌珠落斗妙舞玉成團風

急酒暈薄月斜花露寒翦鐙續殘醉把被接餘懽雖非
長夜飲猶勝萬錢餐

送陳惟允

抱劍入帝都未知何所求觀其辭氣間已類朱阿游肝
膽正激烈既悲還復謳欲銷天下難先斷佞臣頭

送鐵厓先生歸錢塘

時新除江
西提舉

團花染累吳蠶繭五色文綾出金翦海風吹度滕王宮
南浦西山畫簾卷天狗夜吠聲如雷東奎西壁昏煤炰

土洲自可駕黃犢鐵箸何用畫寒灰牛酥燭花春未老
湖上同誰翦芳草真珠酒瀉紫蒲萄金錯刀鐫紅瑪瑙
六橋楊柳香霧淡吳娃一笑千金莫邪不作老龍舞
鐵管自成丹鳳吟軟輿送別湖源道江花照人日杲杲
長風吹送書畫船先生眼空方醉眠

唐五王擊球圖

興慶宮前春正熱綠楊夾道花如雪球門風起日西斜
五馬歸來汗成血潞州別駕醉眼纈雙袖傾歌擁岐薛

申王按鞚宋王馳杖撲球囊手親拏草平如掌馬力均
玉鞭十里不動塵黃門扶入五花帳大衾長枕殉家人
花萼相輝雨氣寒樓中歌管漸闌殘紫騮不蹋球場路
萬里青驄蜀道難

中秋碧雲師送蟹

天風吹綻黃金粟簷前老兔飛寒玉客窗不記是中秋
但覺隣家酒漿熟泖田秋霽稻未鎌葦箔竹斷收團尖
紅膏溢齒嫩乳滑脆美簇簇橙絲甜無腸公子誇饌饌

兩戰前驅終受縛
厲心晝煖白玉臍
夔年夜泣紅銅殼
麴生風度亦可憐
且對霜娥供大嚼
酒後高歌遶碧雲
九峯一夜霜華落

青山白雲圖

青山青青白雲白
一尺小溪千里隔
扁舟樣岸不見人
雞聲何處秦人宅
桃花流水春粼粼
不識人間有戰塵
待得紫芝如掌大
歸來甘作太平民

李嵩宋宮觀潮圖

磁州夜走泥馬駒卧牛城中生綠蕪炎精炯炯照吳會
大築錢塘作汴都玉殿珠樓連翠閣七寶簾櫳敞雲幕
生移艮岳過江南不數東京舊懽樂茂樹盤盤迷綠雲
龍飛鳳舞峯巒奔玉牀下壓大江小海水正入東華門
木犀花開秋可數統統靈鼉振天鼓海門一線截江來
雪壁銀城畫飛舞吳商楚估千萬艘黃龍戰船頭尾高
豈無海道走中上長驅逐北乘風濤煙霧蒼蒼繞城郭
屋瓦魚鱗互參錯百萬驕民事醉醺坐使中原厭羊酪

因循六帝不復讎西風八月凭江樓攢宮人飲白骨恨
洪波不洗青衣羞邦基削盡師臣逐軹道人降子嬰哭
繡甯文錦蹋浪兒反首誰能報君辱廟子沙頭卓大旗
天吳縮頸不敢馳行人指塢話楊璉三十六宮秋草飛

題華山高卧圖

蹇驢不蹋豐丘塵華山歸卧雲臺雲曲肱枕石且適意
世事耳邊殊不聞建隆天子小天下自起潛行風雪夜
經濟元臣不敢眠夜夜衣冠待車駕南征北伐事紛紜

猛將四出貌貅軍盡取荆吳并蜀廣牀頭鼾睡只容君

周昉橫笛圖

一婦跨鐙如習騎一婦鵲立類勇士一婦橫笛坐胡牀
容貌衣裳畧相似髻鬟雲髻作懶狀丫鬟手擎紅錦囊
人言天寶宮中女我意梨園舊樂娼憶昔承平生內荒
宮中消息漸難藏昨宵一曲寧哥笛明日新聲滿教坊
春嬌滿眼情脈脈喚起紅桃親按拍不將三弄作伊涼
潛把閒情訴秦號聲悽調低承索索碧然有聲如裂帛

月落長安天四更六宮一夜梨雲白

太真明皇並笛圖

黑奴絃索花奴鼓譚奴撫掌閹奴舞阿環自品玉玲瓏
御手夷猶親按譜風生龍爪玉星香露濕櫻脣金縷長

莫倚花深人不見李暮側足傍宮牆

此詩見鐵崖集其
前尚有十六句截

去較
勝

雙龍圖

雲谷道人手持一片東溪蘊雲林散人為作雙龍出入

清潮圖硯池濃磨五斗墨手塗脚蹋頃刻雲糝糊既不
為爬山引九子亦不作掣電吞雙珠但見一龍盤空偃
蹇飛下尾間穴一龍攪海奮迅直上青天衢雄者筋脈
緊雌者腹肚麤雙衝交挺白玉柱兩角對樹青銅株宛
宛修尾卷蹴浪花白聶聶鉅甲挾拍闕風鳥性馴肯入
孔甲駕氣惡欲踢豐隆車張吻啖阿香舞爪擎天吳轟
霆時或取旱魃飛雨自足蘓焦枯寸池尺泊雖云不能
一日處十年未用猶可高臥南陽廬雲谷子七寶鉢盂

深袖手雲林子光環金錫且載闕
吾將倒三江傾五湖
洗餘百戰玄黃血盡率凡鱗朝帝都

題黑神廟

雄巫啞角神犀吼翻脚翩躚起筋斗血倂怒嚼葛黨刀
剝面腥風下天狗烏騅挐雲捷飛豹金獸吞頭渾脫帽
青蛇丈八裊蠻旂北府新分南嶽號卷魚鰂吻高插空
飛甍列棟紛青紅花裙草袴自膜拜白日椎鼓夜擊鐘
莫徭酋長不平賊十丈龜趺誇石刻既不能阜旂玄甲

接武黑雲都漫綴竿旄半天黑君不見兗州祠鎮星會
稽借鬼兵井埋骸骨爛屍與堆堞平烏乎五花營千里
馬珠如礫金如瓦亡妻走妾各事仇三尺弓弦淚成把
黑神黑神何為者

投贈周元帥十韻

玉帳臨江近金城鎮海遙鼓聲秋動地劍氣夜衝霄露
下星河白風高草木彫山寒旗獵獵沙靜馬蕭蕭左廣
初傳駕西船已畏燒五離纔散鼠六博又成梟豪傑乘

時奮賢材早見招紫樞虛上座黃闥待清朝會見擒奸
操歸來醉小喬恩波門外柳長拂富春潮

寄天香師

圓帽頂紅毳方袍搭絳紗海龍邀早飯山鹿進秋花試
墨探倭紙尋泉鬪建茶時拋紅豆粒竹下喚頻伽

贈西僧

西離五印度東渡獨繩橋海若擎雙足天花上七條胡
經箇貝葉飯鉢繫柳瓢回首流沙路程途十萬遙

燈下有懷

憶昔童婆店高屯坐夕曛樹聲呼出月石角礙回雲野
雉穿花見清猿隔澗聞馬頭三四子曾縛故將軍

答問湖源風土

湖源源上路東與浦陽連地勝藏春隄民居小有天秋
山紅入畫晴野白浮煙一道桃花水如今泊戰船

聞說

聞說江城破歸心夢裏驚肺肝從此熟手足近來輕春

事愁花朵晨齋怯鼓聲平生慕王猛今日莫談兵

取青樓夜飲戲葉子肅

酒令傳觴急燈花啣燭低山人清似水老子醉如泥天
黑月墮地水寒星在溪猶吹赤躡絃照道畫樓西

送哲古心往吳江報恩寺

蘭若壓江橋長廊畫寂寥鳥嘯春後樹龍起定中潮花
雨隨風散茶煙隔竹消客程他日路清話借通宵

聽雪齋

萬籟入沈冥坐深窗戶明微于疎竹上時作碎瓊聲撲
紙春蟲亂爬沙夜蟹行袁安政無寐欹枕漏三更

大都即事六首

平章橋上日光祿寺前春楊柳綠垂地桃花紅照人粉
香迷醉袖草色妒行輪屠狗悲歌者空埋泉下塵

三月西山道春風平則門繡鞍紅叱撥羶帽黑崑崙衣
襖分香裏壺餅借火溫醉歸楊柳月綠霧掩黃昏

小海春如畫斜街曉賣花連錢遊子騎斑竹美人家襖

色搖紅段鞏香鬪蠟茶額黃斜入鬢側髻半翻鴉
楊柳莫鴉唬鐘樓日又西小車隨客散歸馬望塵嘶碧
瓦差宮樹金波溢御隄時平足行樂誰問醉如泥

紅雪點綿袍青樓酒價高朱絲紅檣杪玉斗紫葡萄春
餞行綾卷秋醺割佩刀簾鉤風不定觸損鸚鵡毛

千步廊前月勝朧照御街風簷鳴寶鐸雷板耀金牌城
影平鋪地樓陰半上階誰家吹短調一夜亂春懷

感古

關內收三傑淮南養八公金成幽血碧龍起瑞雲紅過
眼王章碎回頭帝業空惟餘白楊樹一類響悲風

寄馬將軍

馬服古名將孤軍鎮海壖射鵬天雨血拔梨地飛泉箏
手調銀甲花奴遞玉鞭虎營燈火夜自注十三篇

寄中山隱講師

問訊山中隱中山第幾重風廊巡夜虎雲鉢聽經龍流
水千溪月寒巖一樹松無因淨查潭來共上堂鐘

簡顧明府

水國差徭重江城廬舍稀曉星懸印出春雨勸農歸官
馬哦新月公庭散夕暉欲知通守瘦但視野人肥

贈張習之

膏雨晝庶纖鑪煙不隔簾燕泥侵玉塵蛛網挂牙籤夜
枕花頻妒春衫酒半淹綠窗人散後明鏡摘風髯

立仗馬

照夜玉狻猊霜毛鐵鑿蹏春風金絡腦小雨錦障泥御

駕馳天上軍封受海西日供三品料絨口不聞嘶

次鐵笛道人韻

翠黛鎖眉山穠愁無處安玉環雙鳳叫珠髻九龍盤花
落夢初斷鷺啼春未闌檀槽兒女語昵昵向誰彈

送海一漚十韻

尊者來從乾竺國畏途生出玉門關地窮西北河為帶
水盡東南島若環劫火自如潮勢吼禪心已似石頭頑
法華雨施金盃水貝葉經挑錫杖鐸幻境萬家蝴蝶夢

滄波一箇野鷗閒，染輕龍女花難著。
德重天厨食，自頌
灝氣秋橫，銀色界，白毫夜破。
鐵圍山，嚶溟此日，浮杯去
蔥嶺，何年隻履還。佛日未應違下國，甘霖直欲遍人間。
探窮大地蛟蛇窟，歸立闕虎豹班。

遊黃公洞十八韻

十月山城氣候偏，黃公洞裏看春妍。
五紋鷗雀嬌疑鳳，千葉蟠桃大似蓮。
巨彈落星天狗碎，神砮出土佛牙堅。
雜花冉冉張紅錦，芳草茸茸卧綠氈。
厓瀉蜂腰橫斷杵，

巖撐虎口抱空峽澗邊野雉如人立松下馴麕傍母眠
峯隱金雞啼曉月瀑翻銀漢下長天十圍龍竹高逾樹
五頂神芝秀結拳蘚壁冷雲封鬼谷竇函金穴祕神淵
杵遺商皓基三角劒缺黃巢石半邊丹火有人留蛻骨
玉棺幾度葬神仙扶危鐵柱高擎掌代步花輿不下肩
世隔衲僧方廣地路迷漁父武陵船華陽未老陶弘景
勾漏先歸葛稚川記歷何嘗知晉魏流光端可繼彭錢
蓬萊方丈圖間現流水胡麻世上傳欲報穀城山下礦

已無圯上袖中編便當導引師吾祖深避衡茅一萬年

井西丹房

葛井西頭更向西丹房高與白雲齊
鉛田虎下飛紅電永海龍沈結紫泥
山鬼俯闌窺火候鑪神伏地勾刀圭
飲餘一盞中黃酒坐聽鶻聲松上啼

題院人畫小景

高棟層軒夜未央溶溶新綠漲池塘
風輕楊柳金絲軟月淡梨花玉骨香
亂唾碧茸紆曲逕獨循青瑣轉迴廊

千金一刻誰能買
輸與豪家白面郎

席上得搖字

翠館行厨雪乍消
牆頭新柳又垂條
珊瑚枕煖人初醉
鸚鵡籠寒舌未調
座上綵鸞珠插鬢
掌中飛燕玉圍腰
海棠一夜東風軟
落盡雲邊金步搖

嬉春

春來何處惱柔腸
柳下人家綠瑣窗
畫棟歌塵珠簌簌
雕盤舞袖翠雙雙
鼓翻芍藥雷轟座
酒熟醪糟雪滿缸

最憶瑤芝堂下路一宵歸夢隔春江

贈張帥

馬似游龍掣似蛇弁登雄雉服登假聲吞漢賊當陽坂
氣壓秦皇博浪沙蔽日浮雲行按劍滿天明月臥吹笳
同宗亦有狂書客坐對寒窗擬禡牙

與甯子廉馬敬常飲酒得移字

我愛中州雙國士尊前為我解金龜南山石爛歌逾緩
銅柱沙沈跡未移割土有人窺漢鼎磨崖無客頌唐碑

狂生雅抱澄清志中夜

一作是

聞雞起舞時

登齊政樓

層樓拱立夾通衢鼓奏鐘鳴壯帝畿萬古晨昏常對待
兩九日月自雙飛壽山樹色籠佳氣御水波光蕩落暉
手把闌干頻北望心如征鴈獨南歸

春日

彩毫漆點新蟬翼奚墨雲磨舊馬肝月落小窗瓊珮冷
夢回孤枕玉釵寒荼蘼架雪香生宴么鳳籠煙醉倚闌

笑我一春長閉戶
柳花填巷臥袁安

賦松江漁者

短櫂輕舟白髮翁
往來常在泖西東
一篙綠水孤篷外
九點青山落照中
不盡春光楊柳雨
無邊秋興蓼花風
鷗夷盛酒羊裘臥
表海封齊莫論功

王氏小桃源

一簇林塘隱者棲
天然畫出武陵溪
循牆流水灣灣曲
匝屋桃花樹樹低
春雨閉門山犬吠
炊煙隔竹午雞啼

幽深直待

一作得

秦人避但恐漁郎自路迷

留別賽景初

暖雲將雨驟陰晴四月羅衣尚未成
萬點愁心飛絮影
五更殘夢賣花聲
方空越白承恩厚
繡襦諸子照道明
自笑窮途不歸去
空懷漫刺闔閭城

臨安軍前

寂歷荒城遍野蒿
昔人事業已徒勞
鴈將秋色催歸馬
楓引霜花入戰袍
地阻東南鄉信遠
天昏西北陣雲高

不堪屢作還家夢起向

一作倚

西風撫大刀

書憤

離宮金翠化為煙土宇雕零舊幅員豈是相君酣醉日
況逢天子中興年武關兵馬全無信潯水文章久未鐫
白髮詩翁憂帝室長歌泣血拜啼鵑

良宵

良宵情緒不堪題立遍闌干意欲迷鐵撥忽

一作頓

敲壺

口破金刀頓

一作頓

翦燭心齊絲分楊柳湘簾細紅壓櫻

枕斗帳低彷彿第三橋畔宿月明珠樹夜烏啼

次韻贈張省史從軍南征

震天金鼓紫駝驕
阜轟連珠畫斗杓
甲馬魚鱗開曉日
錦袍花萼上春潮
枕榔雨暗湯泉溢
茉莉風暄海瘴消
幕下何人專草檄
共誇謀議得張昭

畫扇

渴龍飲清江江水皆倒立
風雨滿山來石楠半身濕

湖上二首

綠葢遮籠茵茵碧瀾搖蕩鴛鴦罨畫船中鼓板銷金鍋裏時光

紅杏牆頭粉蝶綠楊窗外黃鸝何處春光最好蹋青人在蘇隄

夜月

夜月小樓簾簾東風深院琵琶料理宿醒未了春光又在隣家

題畫

遠岫層層何處矮
房簇簇誰家煙樹
夕陽歸鳥清溪古
渡橫槎

許將軍郊居

東青門東草地平
曉來濃霜如雪明
細弓膠勁不須焙
手撚髭頭尋鴈聲

簡實彥南

二十四橋風月清
瓊花觀裏坐吹笙
金盤露冷凝脂滑
一夜新霜睡不成

竹蝶圖

落盡春紅春夢熟平沙小苑窗中綠美人睡起背東風
蛺蝶飛來上修竹

鐵笛道人遺箏篴七絕并序

朔客有以箏篴遺道人者道人以送予且將以詩仍
率五溪馮溥錦泉馮文和以成什予深愧無李龜年
之藝而虛得張承吉之名也既次第來韻復賦此答
美意且邀李桐屋僧守仁同賦

贊皇太尉有新題不減吳江與會稽最憶秋山霜月夜
卷蘆一曲醉如泥

朔客蒼頭一尺髭酒酣氣熱卷蘆吹花娘不展徘徊拜
虛負王孫五字詩

長安城裏紫葡萄關塞遺聲透月高一十八星清竅冷
無人喚起薛陽陶

南徐江上月黃昏誰嚼寒鑪對酒尊滿耳闕風全不競
空煩公主嫁烏孫

漢家鹵簿最多儀，來駕雙狐武騎隨。
不似酒邊呼李袞，靜攜九漏月中吹。

一曲邊聲繞月樓，滿天兵氣似并州。
塞鴻不管關山怨，閒却吹螺小比丘。

國手傳聞張野狐，清歌最善月中蘆。
風前靜洗瑩篴耳，別畫明皇按舞圖。

方頤

方頤大口玉顏紅，七尺長身猛似熊。
偏得將軍傳武藝，雲

關街飛馬背開弓

題畫

晴川渺渺停春水怪石峨峨插亂山最愛夕陽煙寺裏

千株古木一

一作伴

僧閒

趙集賢枯木竹石

槎牙老樹響天風寂歷幽篁泣露叢惆悵玉堂舊公子

故家陵廟月明中

楊闕

允孚

允孚字和吉吉水人有灤京雜咏傳於世邑人
羅大已序之曰楊君以布衣襪被歲走萬里窮
西北之勝凡其山川物產典章風俗無不以咏
歌記之兵燹所過莽為丘墟回視曩遊慨然永
歎郭靜思云茫茫天壤名常在賴有灤京百咏
詩蓋道其實也

灤京雜咏一百首

北顧宮庭暑氣清神堯聖禹繼昇平今朝建德門前馬

千里灤京第一程

此以下多述途中之景
行幸上京蓋云避暑也

納寶盤營象輦來書簾檀暖九重開大臣奏罷行程記

萬歲聲傳龍虎臺

龍虎臺納寶地也凡車駕行幸
宿頓之所謂之納寶又名納鉢

宮車次第起昌平燭炬千籠列火城纔入居庸三四里

珠簾高揭聽啼鸞

營盤風軟淨無沙乳餅羊酥當啜茶底事燕支山下女

生平馬上慣琵琶

羽獵山陰射白狼太平天子狩封疆峯巒頻轉丹樓穩

輦輅初停白晝長

居庸千古翠屏環飛騎將軍駐兩關萬里車書來上國

太平弓矢護青山

兩關謂南口北口

穹崖幻出梵王宮雙塔中間一逕通四月雨餘山更碧

六龍行處日初紅

至正年間始營雙塔宮闕巍峩直通絕嶺

翎出王侯部落多香風簇簇錦盤陀燕姬翠袖顏如玉

自按轅條駕駱駝

轅條車前橫木按之則輕重前後適均

仙峽琴鳴水木多別離見月奈愁何題名石壁遼金字

宿雨殘風半減磨

彈琴
峽也

狼山山下曉風酸掩面佳人半怯寒倚戶殷勤喚嘗粥

止宜倦客宿征鞍

俗賣
豆粥

榆林御苑柳絲絲昨夜宮車又黑圍宿衛一時金帳卷

鎗竿珍重白雲飛

此處有御苑黑圍地名大駕經由之
所俗云龍上槐竿是以御駕不由此

處

斷隄遺址古長城一選中分萬柳青年少每快嘗酒美

詩人偏厭綺羅腥

汲井佳人意若何
輓轡渾似挽天河
我來濯足分餘滴

不及新豐酒較多

此地慳水故也

莫道槍竿危復危
有人家住白雲西
兒童采棘顛崖去

杜宇傷春盡日啼

李老谷前山石癯
何年此上遂民居
老龍若作三更雨

頃刻茅簷數尺餘

馬上重看尖帽山
山頭無數白雲閒
漢家天子真龍種

坏土長陵為設關

過葦后妃之所設衛平焉

北去雲州去路賒馬駝殘夢憶京華寒風漸澁山無數
樹影參差月未斜

萬古龍門鎮兩京懸崖飛瀑一般清天連翠壁千尋險
路繞寒流百折橫

塞北凝陰無子規曉看山色不勝奇堅冰怪石澗邊路
殘月疎星馬上詩

東京亭下水濛濛敕賜遊船兩兩紅回紇舞時杯在手
王奴歸去馬嘶風

南國鄉音漸漸稀
朔風吹雪上征衣
邊鴻飛過桓州去
更向窮陰何處歸

窩名檐子果何如
野草黃雲入畫圖
弧矢縱懸仍覓侶
塞前番語笑人迂

驅車偏嶺客南還
始見胡姬笑整鬟
誰信片雲三十里
寒暄只隔此重山

過人到偏頭之北面不可洗頭不可梳冷極故也過此始有暖意素非高

嶺寒氣止隔於此良可怪也歟

李陵臺畔野雲低
月白風清狼夜啼
健卒五千歸未得

至今芳草綠萋萋

此地去上
亦百里許

死央坡上是行宮又喜臨岐象馭通芳草撩人香撲面

白翎隨馬叫晴空

由黑圍至此始合轍馬即
察罕諾爾白翎草地所產

夜宿檀房月滿衣晨餐乳粥碗生肥憑君莫笑穹廬矮
男是公侯女是妃

歡喜坡邊望禁城鸞翔鳳翥卿雲清舉杯一吸灤陽酒

消盡南來百感情

此以下叙灤京之景及
聖駕往還典故之大槩

鐵番竿下草如茵澹澹東風六月春高柳豈堪供過客

好花留待蹋青人

即郭爾多蹋青人指宮人也

先帝妃嬪哈納房前期承旨達灤陽車如流水毛牛提

韉縷黃金白馬良

毛牛其毛垂地哈納圍牆也

聖祖初臨建國城風飛雷動蟄龍驚月生滄海千山白

日出扶桑萬國明

上京大山舊傳有龍居之奉白甯通

北闕東風昨夜回今朝瑞氣集蓬萊日光未透香煙起

御道聲聲駝鼓來

謂駱駝鼓也

撒道黃塵輦輅過香焚萬室格天和兩行排列金錢豹

欽察將軍上馬駝

又是宮車入御天麗姝歌舞太平年侍臣稱賀天顏喜

壽酒諸王次第傳

千官至御天門俱下馬徒行獨至尊騎馬直入前有教坊舞女引導且歌

且舞舞出天下太平字樣至玉階乃止內門曰御天之門

九奏鈞天樂漸收五雲樓閣翠如流宮中又放灤河走

相國家奴第一籌

灤河至上京二百里走者名桂齊黎明放自灤河至御前已初中刻者上

賞

得寵親王馬上回朱門繡闥一時開淋漓未了金釵宴

中使傳宣御酒來

大安閣下晚風收海月團團照上頭誰道人間三伏節

水晶宮裏十分秋

大安閣上京大內也別有水晶殿

四傑君前拜不名輪番內直浹辰更蓬萊山上羣仙集

得似王孫世祿榮

四傑即四集賽也或稱伊克集賽者即大鄂爾多之稱是之謂不名當三問

凡所以浹辰一更者也

北極修門不暫開兩行宮柳護蒼苔有時金鎖因何掣

聖駕棕毛殿裏回

棕毛殿在大鄂爾多

曙色蒼茫閭闔開相君有奏入蓬萊須臾雲擁千官出
又帶天邊好雨來

結綵為樓不用角聲扶上日初明龍駒河北王來覲
直入金門下馬行

相國門前柳未花不多嫩綠便藏鴉東風吹得濃陰合
散入都城百萬家

千官萬騎到山椒箇箇金鞍雉尾高下馬一齊催入宴

玉闌干外換宮袍

每年六月三日詐馬筵席所以喻其盛事也千官以雉尾飾馬入宴

錦衣行處狻猊習詐馬筵前虎豹良特敕雲和罷絃管

君王有意聽堯綱

詐馬筵間盛陳奇獸宴享既具必一大臣稱太祖皇帝禮撤于是而後

禮有文飲有節矣雲和署
隸儀鳳司樂掌天下樂工

儀鳳伶官樂既成仙風吹送下蓬瀛花冠簇簇傳歌舞

獨喜簫韶奏太平

儀鳳司天下樂工隸馬每宴教坊美女必花冠錦繡以備供奉

麗日初明瑞氣開千官錫宴集蓬萊黃門控馬天街立
丞相簪花御苑回

聿來新貢又殊方重譯寧誇自越裳馴象明珠龜九尾

皇王不寶壽無疆

萬歲山有九尾龜

嘉魚貢自黑龍江西域蒲萄酒更良南土至奇誇鳳髓

北陸異品是黃羊

黑龍江魚即哈巴爾圖魚也鳳髓茶名黃羊北方所產御膳用

太平天子重文曹閣建奎章選俊髦一自六龍天上去

至今黃帕御牀高

昔文宗建奎章閣于大內年深灑埽睹御榻之歸然感而賦此

內人調膳侍君王玉仗平明出建章宰輔乍臨閭闔表

小臣傳旨賜湯羊

御前廚常膳有曰小廚房大廚房小廚房則內人八珍之奉是也大廚房

則宣徽所掌湯羊是也由內及外外膳既畢羣臣始入奏事每湯羊一膳具數十六餐餘必賜左右大臣日以

為常于常職

賜故悉其詳

曲曲闌干兔鹿馴
雨肥綠草度青春
主來不避韓盧獵
慣識金衣內貴人

銀蹄天馬衣氍毹
肉食尋常斗酒俱
可惜東遊巡海者
不教騎看試何如

仙娥隱約上簾鉤
笑倚闌干出殿頭
鸚鵡臨階呼萬歲
白翎深院度清秋

宮人兩兩凭闌干
又喜新除內監寬
金線感花鞞樣小

免教羅襪步輕寒

澹墨輕黃淺畫眉小絨絛子翠羅衣君王又幸西宮去
齊向花陰鬪草歸

香車七寶固姑袍旋摘修翎付女曹別院笙歌承宴早

御園花簇小金桃

几車中戴固姑其上羽毛又尺許拔付女侍手持對坐車中雖后妃駝象

然亦

窈窕仙姝出禁闌小西門外綠楊隄五陵公子多豪縱

緩勒驕驄不敢嘶

鳳樓春暖翠重重內禁門開曉日紅
寶馬香車金錯節
太平公主幸離宮

侯王甲第五雲堆秦號夫人夜宴開
馬上琵琶仍按拍
真珠皮帽女郎回

湯羊內膳日差排紅帖呼名到玉階
底事金吾呵不住
腰間懸得象牙牌

東城無樹起西風百折河流遶塞通
河上驅車應昌府
月明偏照魯王宮

官妓平明直禁闌
瑤階上馬月明歸
宮花飛落春衫袖
辛苦桑麻入夢稀

內宴重開馬湏澆
嚴程有旨出丹霄
羽林衛士桓桓集

太僕龍車款款調

馬湏馬姁子也每年八月開馬姁子宴始奏起程太僕寺掌馬者

鸞輿八月政高翔
王勒雕鞍萬騎忙
天上龍歸纔帶雨

城頭夜半又經霜

每年駕起其夕即霜興哉

南坡暖翠接南屏
雲散風輕弄午晴
寄與行人停去馬

六龍飛上計歸程

南坡乃巴納地也故遊人罕至焉

月出王孫獵兔忙王驄拾矢戲沙場皮囊乳酒鑼鍋肉

奴視山陰對角羊

良馬驢駝拾墮箭橘絲羊或四角六角者謂之迷角羊迷義未詳以其角

之相對故曰對角毛角雖奇香味稍別故不升之鼎俎予以見天朝之王食有等差也

雍容環珮肅千官空設番僧止雨壇自是半晴天氣好

螺聲吹起宿雲寒

西番種類不一每即殊禮燕享大會則設止雨壇於殿隅時因所見以發

一
西

正元紫禁肅朝儀御榻中間寶帕提王母壽詞歌未徹

雪花片片彩雲低

此以下多敘一年之景并離咏之物

元夕華燈帶雪看佳人翠袖自禁寒平生不作蠶桑計
只解青驄鞚繡鞍

試數窗間九九圖餘寒消盡煖回初梅花點遍無餘白

看到今朝是杏株

冬至後貼梅花一枝於窗間佳人曉
妝日以胭脂日圖一團八十一團既

足變作杏花

即暖回矣

脫圈窈窕意如何羅綺香風漾綠波信是唐宮行樂處

水邊三月麗人多

上巳日灤京士女競作繡圈
臨水棄之即修褉之義也

葡萄萬斛壓香醪華屋神仙意氣豪酬節涼糕猶未品

內家先散小絨絛

重午節也

百戲遊城又及時西方佛子閱宏規綵雲隱隱旌旗過

翠閣深深玉笛吹

每年六月望日帝師以百戲入內從西華入然後登城設宴謂之遊皇城

是也

紫菊花開香滿衣地椒生處乳羊肥羶房獸炭茶添火

有女褰裳拾糞歸

紫菊花惟灤京有之名公多見題品地椒草牛羊食之其肉香肥迥異他

產

為愛琵琶調有情月高未放酒杯停新腔翻得涼州曲

彈出天鷲避海青

海青挈天鷲新聲也

海紅不似花紅好杏子何如巴欖良更說高麗生菜美

總輸山後蔘菰香

海紅花紅已攪仁皆果名高麗人以生菜裹飯食之尖山產蔘菰

四月東風漸漸和流波細細出官河詩人策馬紅橋過
御柳今朝絲較多

偶因試馬小盤桓明德門前御道寬樓下綠楊樓上酒

年年萬國會衣冠

明德門午門也

怪得家僮笑語回門前驚見事奇哉老翁攜鼠街頭賣

碧眼黃髯騎象來

黃龍深
京奇品

一曲琵琶可奈何
昭君青塚恨消磨
可憐西地黃雲起
不似連天芳草多

翠樓紫閣盡崔巍
花落花開不用催
最是多情天上月
照人西去又東來

承恩留守是何王
錦帳成圍促宴忙
却怪西風渾不顧
一般吹送滿頭霜

不須白紵備晨炊
乳酪羊酥塞北奇
泥土炕牀銀甕酒

佳人椎髻語侏離

東風亦肯到天涯燕子飛來相國家若較內園紅芍藥

洛陽輸却牡丹花

內園芍藥迷望亭亭直上數尺許花大如斗揚州芍藥稱第一終不及上

京也

賣酒人家隔巷深紅橋正在綠楊陰佳人停繡凭闌立
公子簪花倚馬吟

白白羶房撒萬星名王酣宴惜娉婷李陵臺北連天草
直到開平縣裏青

東風吹暖柳如煙寄語行人緩著鞭
燕舞巧防鴉鵲落馬嘶驚起駱駝眠

時雨初肥芍藥苗脆甘味壓酒腸
消揚州簾卷東風裏

曾惜名花第一嬌

草地芍藥初生軟美居人多采食之

霜寒塞月青山瘦草實平坡黃鼠肥
欲問前朝開宴處

白頭宮使往還稀

文宗曾開宴於南坡故云

雖然玉宇桂無花秋比江南分外佳
絃管畫樓人散去

舍郎攜妓勸嘗瓜

俗以月下送瓜果往還上京不產桂花

御饌官厨不較餘金門掌膳意勤如更分光祿餅中酒

爛醉歸時月上初

凡御膳及民間者謂之貢餘光祿寺掌御酒

別却郎君可奈何教坊有令趣興和當時不信郵亭怨

始覺郵亭怨轉多

興和署迺教坊司屬掌天下優人

窈窕誰家女未笄日高停繡出簾帷背人笑指青霄上

認得宮庭白鴿飛

灤京九月雪花飛香壓萸囊與夢違鴈字不來家萬里

狐裘旋買換征衣

雪深連月與簷齊誰把新吟向客題一字成時筆如鐵
不如載酒畫樓西

出塞書生瘦馬騎野雲片片故相隨凍生耳鼻雪堪理
冷入肝腸酒強支

凡凍耳鼻即以雪揉之方回近火則脫

宮監何年百念消冠簪驚見髻蕭蕭挑燈細說前朝事
客子朱顏一夕彫

買得香梨鐵不如玻瓈碗裏凍潛蘇書生半醉思南土

一曲燈前唱鷓鴣

梨子受凍其堅如鐵以井水浸之則味回可食

強欲驅愁酒一卮
解鞍間看古祠碑
居庸千載興亡事
惟有天中月色知

塞邊牴牾長兒孫
水草全枯乳酪存
不識江南有阡陌
一犁煙雨自黃昏

試將往事記從頭
老鬢征衫總是愁
天上人間今又昔
灤河珍重水長流

潘高士音

音字聲甫天台人生十歲聞崖山之變昏迷不

食者累日長而絕意進取衣服禮節皆仍宋時
之舊擬野蔬以自給或勸之曰夷齊尚矣陶靖
節心雖為晉未嘗不食粟今何自苦乃爾於是
躬耕世田十餘畝非其力不食也築室南洲山
中扁其軒曰待清或勸之著述曰六經語孟先
儒所言備矣吾何以注脚為居閒感憤或形之
咏歌以洩其悲思慷慨之志讀書有得往往筆
之壁牖間至正三年詔徵天下遺逸廉訪使檄

贊之行固辭嘗歎曰泉石膏肓非其時莫可療也乙未歲卒年八十有六時明太祖已渡江取太平路矣兵火後卷帙散亡嘉靖間七世孫日升搜葺其遺稿及讀書錄并刻之

有所思

中心有所思感損雙蛾眉美人竟長往使我歎離居寂寞就孤枕強眠誰得知夜深清露重飛夢欲何之覺來日遲遲分照上羅幃妝臺理雲鬢種種盡成絲

遠遊

聖人久不作大道將已矣吾生既無之惟有幸夕死殷
勤謝良友遠涉西江水方從草廬公共究鵝湖旨紛紛
朱陸議竊幸窺端倪奈何執德偏一聘翻然起春秋嚴
內外乾坤定冠履西蜀已空亭箕山仍洗耳迢迢返巖
阿惟當隨鹿豕

待清軒

殷本高辛裔六七起聖君受王一剝喪高賢盡隱淪坐

待天下清用沽席上珍况茲黃袍破我生當其辰衣冠

歸闕

海國陷黃塵寧有人間世能逃率土濱結茅苦

提頂渾忘虎豹隣寤寐祇思晉幽沉迴避秦何時啟昌

運闕

產聖人願言同二老荷杖還歸仁

山中寄友人

我來卧白雲潭影消華髮經歲無稻梁侵晨采薇巖峰
頭天籟鳴隴上樵歌發還擬醉濁醪與君弄山月

反北山嘲

達人知進退，曲士豈同謀。
盡使藏身去，誰當為國憂。
煙霞成痼癖，聲價藉巢由。
虎嘯雄心在，胡為鶴唳愁。

友人夜宿

雲山多樂事，叢桂共君攀。
別去十年久，歸來兩鬢斑。
倚窗邀素月，把酒慰離顏。
醉後松堂卧，濤聲落枕間。

南洲丁氏草堂

仙客栖真處，衡門枕曲流。
地偏三島接，天迴萬山浮。
匣劍星霜久，函書洞壑幽。
忘機對鷗鳥，華髮老滄洲。

悼楊侍郎

屈指漢遺老如君復幾何
鳳池冠劔近鈴閣典章多
國已成禾黍人還隱薜蘿
那堪川上水東逝之迴波

山居阻雨

霏霏風雨暗郊原有客含淒獨掩門
山鬼嘯雲移峭壁
毒龍將海浸孤邨
愁來自灑青楓淚
戰罷誰招絕漠魂
蘭足空齋無一語
不因岑寂怨黃昏

東溪水漲

積雨經時苦自長東溪迴首意淒涼連山巨浪飛春雪
數點驚鷗下夕陽神女含情愁洛浦美人揮淚灑瀟湘
欲尋舟楫無由渡咫尺天涯共渺茫

登樓秋望

木落霜清鴈影流偶來長嘯獨登樓笳鳴薄暮寒鴉集
劍倚遙空紫電流萬里邊塵連大漠一樽漢月醉高秋
深閨少婦思征戍何處聞砧不動愁

真覺寺訪蔡上人

為尋支遁扣禪關
趺坐觀空出宇寰
淨土無塵勞白拂
天花如雨落青山
龍皈寶座香雲滿
鵲繞經臺佛日閒
誰謂陶潛偏嗜酒
從今蓮社未應還

龐德公

高士遺蹤尚可尋
襄陽城外闕幽林
久知軒冕浮榮薄
已卜耕鋤樂趣深
麟閣不圖丘壑相
鹿門應遂白雲心
千秋事與人俱往
滿目松楸帶夕陰

讀岳武穆傳


萬里浮雲入望陰
千山落日正沈沈
當朝自餒中興志
出塞徒勞上將心
臣子終天仇未復
姦邪設險計殊深
惟餘一篋精忠傳
揮淚頻看不自禁

悼文丞相

回首中原已陸沈
捐軀朔漠氣蕭森
恐吹餘燼成炎漢
未許黃冠返故林
社稷忽生千古色
綱常無忝百年心
總拚清骨縈荒草
不復胡沙掩素襟

聞鵑

子規聲切月輪斜起望諸陵憶漢家婦女尋芳渾不解
鬢雲爭插杜鵑花



元詩選初集卷五十四